



Senin, 14 Maret 2022

Ogen: Masmur 43:1



Kapiti Min Perkarangku



Passion peenemken igelari minggu Judika si ertina cidahkenlah kerajanku bujur o Jahwe. Minggu e mabai kita ku bas Dibata si adil, si ngidah kerina kecibalta seh ku bas perukuren ras perbahanenta. Megati pe turah si la bujur man banta, ndatken tekanen ras perbeben si mberat, lanai lit si ngasup nampati ras mereken serpang puluh. Dibata ngasup mereken keadilan man banta, IA me penundalenta, si mereken serpang puluh i bas kerina perkaranta.

Ogenta Masmur 43:1 e nuriken kerna perbeben anak-anak Korah si sangana i bas pembuangan Babel. Anak-anak Korah biasana erdahin i Rumah Pertoton nikapken kebaktin ras ende-enden pujin i bas kebaktin e. Ia pe ikut rende jadi tim paduan suara, e maka gedang-gedang wari ia lit i bas Rumah Pertoton. Paksa ia i Babel, gulut ka ukurna sabap itadingkenna Rumah Pertoton Jerusalem si enggo runtuh. Inganna tading ras inganna erdahin arus itadingken. I Babel la lit rumah pertoton inganna erdahin ras inganna nembah Dibata. La erdahin e pe kin enggom jadi persoalen man bana, tambah ka ingan tading si la pmentu. E maka i kuta Babel, ia isaling-saling, igombangi ras itokohi kalak. Mesui pusuhna meggi Dibata e pe ipekitik kalak Babel. Lanai langlang sedakna pusuh anak-anak korah enda, lanai tehna ku ja ngadu, man ise ituriken pusuhna si getem.

Dungna nulih ia ku Dibata, tek ia maka Dibata e ringan nge i Babel ras pasti nggit IA nampati adi erlebuh man baNa. Erlebuh anak-anak Korah enda man Dibata arah pertotonna nina: kapiti min perkarangku nadangi kerina kalak jahat. Ietehna Dibata ngasup ngenehen isi pusuh kerina jelma, si bujur ras si jahat. Janah Dibata hakim si adil, ugapa pe erpihak ku kalak bujur. Bage me iajuk kita paksa enda tetap erlebuh man Tuhan, i bas kerina kecibalta. Dibata adil ras isampatina nge kalak bujur bas perkarana.